

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 80 (2001)

**Heft:** 7

**Artikel:** La spina ella spatla

**Autor:** Deplazes, Gion

**Kapitel:** 4: Giacun Hasper Muoth 1844-1906

**DOI:** <https://doi.org/10.5169/seals-881892>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

#### **4. Giacun Hasper Muoth 1844–1906**



##### **Sia veta**

Giacun Hasper Muoth<sup>1)</sup> ei naschius a Breil, enta Cuort da s. Mihel igl onn 1844, sco sulet fegl da Gion Mattiu e da Maria Cristgina, naschida Tuor. Il bab «in originalun incalculabel, agens detgavunda, caracter labil, nauschs e malizius sch'el haveva zatgi ni zatgei sil muc, ina natira malruasseivla».<sup>2)</sup> In meister dil lungatg tschintschau en rema e prosa! La mumma Maria Cristgina, numnada Stina, seigi stada ina femna da siu fatg, ina persuna mudesta e fina che fageva il paun e las pettas pils da Breil. Ella ha luvrau ina veta ora per sia feglia pupratscha, pil mariu ed il fegl e giu bia pazienzia cun ses dus umens.

1 Tuor, L., 1994, Giacun Hasper Muoth, Cronica 1 e 2, Ediziun da Breil.

2 Cronica 1, 18.

Igl atun 1850 ha Giacun Hasper giu da far ils emprems pass en scola rurala. Ils da Breil fuvan progressivs en fatgs da scola e vevan gest quei onn scaffiu in «Regulativ per la scola rurala» che pretendeva denter auter ch'ils affons hagien dad ir a scola, cura ch'els hagien cumpleniu sis onns. Muoth pareva dad esser in bien scolar. Naven dils 1857 fuva el tier il scolast superiur Placi Antoni Bisquolm da Sumvitg. Quel veva il num da pretender da ses scolars enzatgei e saveva esser zun rigurus. El sez menava stediamein in «Diurnal de scola» che lubescha da sefar in maletg dalla scola da lezzas uras. El teneva era quen dallas absenzas. Ils geraus da Breil e members dil cussegl da scola visitavan savens la scola e spargnavan buca cun remarcas criticas. Il medem fageva era igl inspectur da scola. Las scolas da Breil fuvan enconuschentas per las «meglieras della entira Cadi».⁵) Ils anno 1859 para la scola da ver giu ina crisa. Igl inspectur veva visitau la scola ed ils 22 da mars noda Bisquolm en siu Diurnal de scola: «Ils scolars ein marschs, corrupts, lischai, en lur secuntener maltschechs e prepotents.»⁶) Denter ils garmadis para era nies Giacun Hasper dad esser staus. Pertgei Bisquolm noda el diari dils 30 da mars: «Sin quei di han Giacun Hasper Muoth e Gion Stivet dau nauschas e loschas rispostas.»⁷) Muoth e siu cumpogn fuvan ella davosa classa ed ella spema dalla pubertad sco ei pareva. Il bab Mattiu fuva dall'idea ch'il fegl stoppi emprender buc il davos tudestg. El tarmetta il schani igl atun 1859 a Feldkirch ella scola dil marcau. Per l'emprema gada va el egl jester. Ed el para dad esser staus zun motivaus e huslis en scola. Siu attestat dalla fin mars dils 1860 ei lu era leusuenter.⁸) Il scolar seigi staus fetg diligents, siu sedepurtar buns, sias prestaziuns vegnan giudicadas culs suandonts predicats: Religiun, tudestg (leger e grammatica) quen e calligrafia «fetg bien»; ortografia e s'exprimer «bien». El secund semester ein sias prestaziuns stadas fetg bunas, quei dapertut. El era

3 Muoth, Cronica 1, 32.

4 Cronica 1, 46.

5 Cronica 1, 46.

6 Cronica 1, 49, facsimile digl attestat.

il meglier scolar da 34 ed ha retschiert ils 3 d'uost in premi. Siu bab veva tarmess el per emprender tudestg e Muoth sez exprima surlunder 1898 en las Annalas il sequent: «Cun vender aigl e tschaguolas, faultschs e tardents ect. se schava da lezzas uras daveras far fatschentas lucrativas sin Surselva, mo mai e pli mai cun ina scola privata, la quala intendeva l'instrucziun dil pievel.»<sup>7)</sup> Quei che less bein dir: cumprar e vender renda meglier che d'emprender!

Podà perquei ha siu bab priu el ord la scola e mess el en piazza a Cuera sco «mat de commissiuns» dalla uustria il «Zen». Ins sa ed astga scurlar il tgau. Siu bab era nuncalculabels en tut siu far e demanar. Mo el fuva gia lu semanevraus en ina situaziun finanziala zun precara. Ed ei maya da mal en pir. Dapi sia maridaglia veva el cumprau, vendiu e brattau canticamein da siu fatg, cumprau e midau casa ed engrondiu siu muvel, aschia ch'el possedeva in e plirs cavals e cargava 12 vaccas, bueva denton pli bugen alcohol che latg. Mava el ina gada a marcau cun plirs tocs biestga, fuva el el cass da turnar pér suenter entgins dis, e quei buca gigins. El ei vegnius en deivets ed ha stuiu metter sut adina dapli da siu fatg.

Siu fegl era buca ventireivels a Cuera.<sup>8)</sup> El veva da parter ina paupra stanza aunc cun dus giuvens mazlers che sortevan magari la sera e turnavan bui sco mélidas tard viaden ella notg. La primavera 1861 tuorna Giacun Hasper a casa e gida ils ses sil funs. Igl october serenda el a Mustér en la scola reala dalla claustra, en l'emprema classa. Cheu ha el probablamein gia fatg sia emprema emprova poetica, quei per tudestg.<sup>9)</sup> Oscar Alig numna quest'emprova «eine deutsche Rührballade, die schon mehr als eine Sprachübung ist».<sup>10)</sup> Sias notas ein era cheu bunas tochen fetg bunas. A dunsena eis el staus en ina casa privata. La claustra sco era la scola fuvan da quei temps periclitadas en lur existenza. Tgi che leva far il gimnasi maya a Sviz. Dils 1836–47

7) Cronica 1, 47.

8) Cronica 1, 50.

9) Cronica 1, 52s.

10) Cronica 1, 53.

vevan ils gesuits menau quel cun grond success tochen ch'els ein vegni bandischai dalla Svizra 1848. Igl onn 1856 ha pader Theodosius Florentini aviert danovamein il gimnasi.

Igl atun 1862 entra Giacun Hasper ella scola a Sviz e banduna quella suenter la tiarza classa igl uost 1865. El fuvi beinvesius da professers e conscolars e sco Luregn Cagianut sa da raquintar «in dils megliers pianists, il secund suenter G. Schmid de Grüneck, il futur uestg de Cuera».<sup>11)</sup>

Daco che Muoth ha bandunau Sviz, nua ch'el veva conscolars dil Grischun e plirs da Breil, san ins mo lignar. Fatg eisi che siu bab veva fatg schliatas fatschentas ils davos onns e ch'el fuva sesurdaus talmein agl alcohol che vischins da Breil han supplicau las instanzas ufficialas da dar al Mattiu dus ugaus, gie schizun da metter el a Realta.<sup>12)</sup> Podà che Giacun Hasper ha giavischau sez da prender empau distanza per mitschar dad ina confruntaziun permanenta culla criua realitad.

Fatg eisi ch'el ei buca turnaus a Sviz, mobein ha cuntuau il gimnasi ella quarta classa dalla partiziun tudestga da St. Michel a Friburg. St. Michel metteva gronda peisa sils lungatgs vegls, latin e grec, sco era sil tudestg. Cheu eis el era entraus 1866 ella societad studentica «Zähringia» ed ei daventaus in uerbel commember da quella sco in referat davart «Die Verschwörung des Catilina» muossa, dend perdetga da siu interess per la historia e sia capacitat da raquintar.<sup>13)</sup> Era sco criticher dallas lavurs dad auters sefa Muoth valer.<sup>14)</sup>

En scola ein sias prestaziuns excellentas ed el retscheiva in premi.

Igl onn da scola 1866/67 paleisa Muoth siu interess e talent per la disputaziun e l'improvisaziun, surtut era siu humor. A Muoth vegn surdau la redacziun dil «Fegl da sgnoccas», quei ch'el fa cun grond

11) Cronica 1, 60.

12) Cronica 1, 59.

13) Cronica 1, 66: «Die Sprache ist durchgehends sehr flüssig und gewandt, weit entfernt von der gewöhnlichen trockenen Erzählungssprache.»

14) Cronica 1, 66: «Dann verdient er seines Fleisses wegen, sowie auch der Kritiker Muoth die vollste Anerkennung. Dem letzteren jedoch, der sich etwas zu sehr am Witzeln gefällt u. oft persönliche Anspielungen in seine Kritik bringt, wird die Bemerkung gemacht, künftighin Alles das fernzuhalten, was nicht streng zu einer ernsten, würdevollen Kritik gehört.»

success. Plinavon punctuescha el la valeta dil lungatg improvisau e fa la proposta ella «Zähringia» da cultivar questa habilitad.<sup>15)</sup> In criu destin ha denton gest quei onn purginau la flur dil humor e dalla hilaritat dil giuven student Giacun Hasper. Gia il schaner 1867 sto siu bab sedeclarar insolvents. Talmein fuva el secavistraus els deivets tras siu beiber, «cumprar, arrundar, specular, vender».

Era ina scappada en Spagna tier enconuschents ha gidau nuot, ed el ha stuiu turnar sco fegl perdiu ed ei vegnius screts ora.

La primavera 1867 ha Mattiu fatg scussiun. Far scussiun era da quei temps ina greva zanur, buca mo per la persuna pertuccada, mobein era per la parentella. Siu fegl Giacun Hasper ha bandunau il gimnasi St. Michel e la «Zähringia» per canticuar ses studis a Losanna, sco el indichescha alla uniu da students. «La zanur da quella sclavinada ha Giacun Hasper adina resentiu»<sup>16)</sup> – era sch'el ha mai plidau surlunder. Che Muoth ei serendius a Losanna ed ha visitau leu ina scola, ei documentau tras ina brev dall'entschatta da zercladur: «Quei che partegn tier la scola vai pulit. Jeu sun carezaus dils professors et dils sculars e progresseschel fetg ... De continua la vetta, che jeu vevel entschiet fuss jeu vegnius malseuns pertgei jeu stevel savens tochen L'ina cun nuot e lu empau bier. Co lev jeu fa auter senza danès?»<sup>17)</sup> Eifer cuort temps ha el era survegniu novas da sia mumma che saveva sco ei para buca scriver, ha denton schau scriver l'Onna Maria Camihel. Ella admoneschia il «Charissim» fegl da ver quitau dalla sanedad. Pigl auter sa ella da dir ch'ei seigi buca schabegiau bia aunc ussa. Il bab hagi survegniu ina piazza en Giadina (nua ch'el ha buca teniu ditg la dira). Ella sappi habitar senza tscheins en casa tochen d'atun e gudogni il paun cun far la furnera.

Tgei scola che Giacun Hasper ha frequentau a Losanna ei buca pli dad eruir. Eisi stau ina specia da scola mercantila ni ha el visitau ina

15 Martin Schmid, directur dil Seminari scolastic a Cuera, scolar da Muoth, punctuava adina puspei la gronda habilitad da raquintar da siu magister da historia.

16 Cronica 1, 74.

17 Cronica 1, 76.

academia? Zazu duront la stad eis el turnaus a Breil e restaus leu igl onn 1867/68. En siu cuors dalla veta attesta el sez da buca haver saviu terminar il gimnasi muort las relaziuns da casa. Quei atun ei la gronda part da lur fatg vegnida sut il marti. Per segirar a sia mumma tetg e fuorn cumpra Giacun Hasper (23) cun agid d'ina segironza da siu aug (frar dalla mumma) la casa paterna per 2600 frs.<sup>18)</sup> Ins po s'imaginart tgei unviern che quei ei stau per in giuven da 23 onns, student senza plazza e paga el ravugl d'ina famiglia, ina gada beinstonta, che veva piars tut!

Ferton ch'il bab fageva vinavon il sturnichel e vilentava cun sia lieunga tussegada ils vischins, ei il fegl s'occupaus culla litteratura. El ha scret in epos «Rhätus» en plirs mellis alexandrins, imitond l'Aeneis da Vergil, «Rhätus», ina ovra ch'el ha disfatg pli tard. Plinavon ha el luvrau vid in drama «Jörg de Jörgenberg» (Gieri dil Munt S. Gieri) ch'el vess bugen schau representar ils da Breil. Da quell'ovra ei restau mo la poesia «Il cavalier».<sup>19)</sup> Tenor pader Maurus Carnot ha el era translatau il medem unviern «Ernst von Schwaben» da L. Uhland.

Duront igl unviern para el da ver priu part beinduras dalla veta da cumpignia dils da Breil. Mo a liunga vesta ni saveva ni vuleva el star culs mauns en sac. Sias ondas vessen pagau ad el il studi da teologia. Mo leutier saveva Muoth buca sedecider.

La primavera dils 68 serenda el a Minca, da quei temps in dils principals marcaus da studi dils Svizzers. Leu leva el sededicar ad ina preparaziun commerciala, malgrad che la scienzia interessava el pli fetg. Grazia agl agid d'in amitg reussescha ei ad el da finanziar silmeins l'entschatta dil studi all'universitat. Leu s'enscriva el ils 9 da matg 1868. Muort malsogna e manco d'existenza ha Muoth saviu entscheiver il studi pér cul semester d'unviern 68/69, in pauper giavel, sco quei che Leo Tuor scriva, «senza daners ni calzers, strusch resti ni nuot, in rugadur en lumpas, in vagabund, la nera fom el venter».<sup>20)</sup>

18 Brev da marcau dils 14-12-1867, Cronica 2, 216.

19 Tuor, L., 1997, Giacun Hasper Muoth, Poesias 1, 198s.

20 Cronica 1, 81.

Minca e sia universitad duevan daventar liug da dimora e studi tochen l'entschatta uost 1873, cura ch'el ei vegnius eligius professer alla Scola cantunala.

Ils onns da Minca ein stai per Muoth in cumbat denter viver e murir.

«Suffrir, pitir ed engaldir/Lein nus bugen, mo buc murir.»<sup>21)</sup>

Durmir stueva el magari en in casament zanuas sut il tettg. Per temps parteva el la stanza cun in calger ed in cusunz che luvravan en quella igl entir di. Daners per in'atgna stanza veva el buc. Ina suppa caulda survegneva el gratuitamein el «Hofbräuhaus». Satel e stebel seigi ei stau adina: «Jeu cumpravel truffels e biera e mavel cun quei sin mia stanza. Leu schevel jeu: 'Quei cheu ei la bistecca'. E pilvermo, igl effect fageva ei.»<sup>22)</sup> Gie, el veva per temps gnanc calzers e mava allas lecziuns en pantoflas, pretendend, buca senza ironia, el hagi survegniu quellas da Bebel, il renomau socialist da quei temps. Tgei forza ha teniu el sidretg? – Quei ei il grond legn da sia existenza.

Sper sias miserias culs daners a Minca vegneva el mudergiaus culs quitaus da casa. In tettg per la mumma, aschia ch'ella saveva gudignar il paun da mintgadi cun far paun e pettas pils da Breil, veva el procurau. Tgei ch'il bab fageva tut, gliez saveva el mo supponer. Bia bien franc buc. Quels quitaus stueva el tener per sesez. El plidava mai directamein dalla scussiun. La dolur scheva ses fastitgs tscheu e leu en sias ovras.<sup>23)</sup>

Malgrad tutta miseria ei Giacun Hasper staus enscrets ed ha visitau las preleceziuns dils professers naven dil semester 1868/69 entochen 1872/73.<sup>24)</sup> Igl atun 1872 fuva el vegnius refusaus da far examen «wegen Mangel an vorschriftsmässige Ausweise». Ina nauscha frida! Aunc adina ha el buca dau per piars, mobein ha visitau lecziuns privatas, sco el scriva a siu meglier amitg Gustav Loretan, da quei temps a Heidelberg.<sup>25)</sup> Muoth ha priu viva art e part dalla secziun studentica a

21) «Igl um vegl e la mort», en: Ann. 22, 11.

22) Deplazes, G., 1987, Prominenzas en l'anecdota, 92.

23) Poesia «Igl um vegl e la mort» en treis variantas. Pareglia Poesias 2, 252.

24) Maissen, Fc., 1990. Pareglia: Publicaziuns da sur Felici Maissen, 1981–1997, nr. 186.

25) Cronica 1, 113, 115.

Minca sco quei ch'el veva era fatg a Friburg e Losanna. El saveva esser leghers e spirtus. Mo buca meins luvrus e serius en sias lavurs sco en sia critica da lavurs dils auters. Ei fuss totalmein falliu da vuler far dad el in «student perpeten» che mo gauda e fa pipas. Per gliez veva el memia grondas peisas sin sia schuiala. Gustav Loretan caracterisescha el sco suonda: «Muoth war, als ich ihn zum ersten Male im Frühjahr 1871 in München traf, ein recht armer Student, der immer mit Sorgen um das tägliche Brot zu kämpfen hatte. Er zog mich aber sofort an, und da er die Isarstadt und ihre Kunstschatze durch und durch kannte, wurde er mir Führer und Mentor. Ich erinnere mich noch, wie wenn es heute wäre, an meinen ersten grössern Ausflug, den ich gemeinsam mit ihm nach Nymphenburg, dem bayerischen Versailles, unternommen. Er wusste über alles Bescheid und besass viel kritischen Geist! – Wir wurden gute Freunde.»<sup>26)</sup>

Joseph Büchi, in auter cumpogn da studi, seregorda da Muoth sco suonda: «Ich sehe ihn noch vor mir, den schlanken, hochgewachsenen Sohn der Bündner Berge, mit den klaren, fragenden Augen und dem fast dürfstigen Gewand, denn er musste schmal durch, der arme Student. Bei uns Schweizern erschien er nur ab und zu beim Abendschoppen. Er war immer bescheiden, still-fröhlich, von trockenem Humor, ein guter Erzähler, in allem, was sein Fachstudium betraf, wohl beschlagen, auch für die politisch-religiösen Zeitfragen sich interessierend, von treffendem Urteil über Personen und Sachen. Ein durchaus reiner und feiner Mensch.»<sup>27)</sup>

Gustav Loretan sa aunc dad in auter Muoth. El rauenta digl onn 1871: «Manchen Abend verbrachten wir beim schäumenden Bierhumpen in anregendem Zwiegespräch. Bei vorgerückter Stunde, wenn der Geist zu wirken begann, konnte es in diesem genial veranlagten Kopfe auch mitunter recht unheimlich aufleuchten, so dass ich mir in solchen Augenblicken hie und da die Frage stellen musste, ob mein

26 Cronica 1, 102.

27 Cronica 1, 96.

Freund nicht an jener geheimnisvollen Scheidelinie angekommen sei, die das Genie vom Wahnsinn trennt.»<sup>28)</sup>

Da quei temps vegneva el mudergiaus empau da tuttas varts. Aschia scriva el en siu diari (fatgs mo per cuort temps) ils 5 d'uost ch'el hagi secret ina tresta brev a sia cara. El fuva, sco siu diari relata, s'inamuraus tochen sur las ureglas. Si'amur ha buc anflau il ver eco, ha denton turmentau sia olma. Il fretg ein las 5 poesias dalla «Amur studiosa» ch'el sez ha mai publicau, denton salvau per veta duronta, sco pli tard Peider Lansel cun sias «Fluors sechadas». Paucs dis avon veva el entupau in da ses amitgs cun sia biala dunna giuvna. Lezs vevan fatg ad el in schenghetg da 10 francs. Tgei ha el fatg cun quels? Lavau giuaden ils quitaus: «Abends war ich illuminiert.»<sup>29)</sup> Paucs dis suenter ha el stuiu supplicar Loretan per in flurin, aschia ch'el debitava 2 flurins e miez. Ina paupra caussa per in mat da 27 onns! Pli tard, cura che Loretan fuva a Heidelberg, han els adina puspei sescrit. Ina ga ha Loretan dau ina marca da posta a siu pauper amitg. Per Muoth eis el staus ina petga duront ils grevs onns da studi.

Che Muoth ha fatg studis serius a Minca ei documentau e gnanc tgisà, era sch'el ha buc adina giu ils raps per s'enscriver.<sup>30)</sup> La pli gronda influenza paran ils professers A. K. Hoffmann e Carl Prantl da haver giu. Hoffmann doceva filologia e litteratura germana e romana. In um spontan cun ideas genialas, en siu far, sias ideas ed en siu caracter parentaus cun Muoth. Carl Prantl era filosof e filolog. El sespruava da sparter la cardientscha cristiana dalla filosofia. Muoth ha tedlau tier el «Logica ed enciclopedia», «Historia della filosofia» e «Svilup della filosofia dapi Kant». Da cheu ei il pass buca staus gronds per carmalar las marveglias per las ideas da J. J. Ignaz Döllinger, spiritual catolic e professer per la historia dalla baselgia ed il dretg ecclesiastic. El ha cumbattiu il dogma dalla infallibladad dil papa «sco cristian, teolog e burgheis» ed ei vegnius excommunicaus 1871, ha denton giu sia

28 Cronica 1, 107.

29 Cronica 1, 105, tenor Diari.

30 Cronica 1, 80–120; Cronica 2, 46–80.

influenza tochen la mort. Muoth che vegneva neu dad ina tenuta liberalisonta tochen liberala ei vegnius confirmaus en siu patertgar dallas ideas da siu temps a Minca. El ha persequitau stediamein ils eveniments ed ha era rapportau ils fatgs ella gasetta liberala «La Ligia Grischa», essend il redactur da quei temps Alexander Balletta, siu amitg da Breil.

Igl ei buca documentau che Muoth ha visitau las prelecziuns dil historicher cultural H. Wilhelm Riehl<sup>51</sup>, sco quei ch'el scriva ella Cuorsa dalla veta. W. Riehl fuva da lezzas uras il star dils professers a Minca. Sia influenza semanifesta cuntuadamein elllas ovras historicas sco litteraras da Muoth, oravontut en siu interess per la veta purila e la presentaziun da quella sco en «A mesiras» ni «Las spatlunzas».

Muoth ei era buca secuntentaus mo cun visitar lecziuns e seminaris dils professers. El ha adina puspei fatg lavurs el ravugl dils students ed era studegiau dasperas, quei cun sistem. Aschia noda el la fin d'uost (vacanzas) ch'el seigi vid il studi da Balmes, Don Jaime Luciano, filosof spagnol e publicist. Quella lavur stoppi esser alla fin en dus dis.

Mo dapi che Gustav Loretan fuva naven da Minca e sia amur veva pigliau ina mala fin, s'isolava Muoth adina pli e pli. El veva 29 onns e cattava buca pli il contact culs commititons e lur sedepurtar. Pil semester da stad fuva el buca pli s'enscrets. El frequentava studis privats.

In radi pli cauld porta la biala publicaziun dallas «Spatlunzas» ella gasetta «Ligia Grischa» e la renconuschientscha sur ils cunfins romontschs ora. Ultra da quella idilla en hexameters suondan las fablas en rema sco «Il bov e la rauna», «Il spuentegl», «Igl asen e siu patrun», «La dunna e la gaglina» sco era «La vusch de S. Glieci», publicadas sut il pseudonim F. M. (Franz Muoth). Alexander Balletta rapporta era dil success en la Svizra tudestga entras Theodor Curti (1848–1914), politicher e publizist, aschia che Muoth vegn enconuschents sur las scheinas romontschas ora.

51 Riehl, Wilhelm Heinrich, «Culturgeschichte der Renaissance- und Reformationszeit».

En quei mument decisiv vegn la nova che duas plazzas seigien screttas ora per la Scola cantunala, ina per tudestg, latin e historia dalla Svizra. Alexander Balletta, lu secretari guovernativ, fa attents Matheias Capeder ed Alois Steinhauer-Latour, anteriurs students da Minca, sin Muoth. Lez da sia vart s'annunzia il zercladur 1873 cun ina cuorta biografia, vegn denton supplicaus dalla Cumissiun d'educaziun per detagls sur da studi e patertgar. El fa quei in meins pli tard extensivamein.

Denter auter: «(Ich) hörte als Studirender der Philologie eingetragen sämmtliche Collegia über klassische u. mittelalterliche Philologie, Geschichte u. Philosophie. ... Innerhalb dieser bunten Menge wissenschaftlichen Materials ist selbstverständlich manches in einem noch embryonalen Zustand, doch kann ich behaupten, dass der Boden, auf dem ich mit Erfolg und innerer Befriedigung arbeiten kann, bereitet ist. Ich hege sogar die Meinung, durch meine Abschweifungen keine Zeit verloren zu haben, da die Leichtigkeit und Raschheit, mit der ich jetzt zu begreifen und zu arbeiten befähigt bin, doch rascher zum eigentlichen Ziele der lebendigen Durchdringung irgend eines Faches führen muss, als das auf dem Wege eines einseitigen Brodstudiums möglich ist.»<sup>52)</sup> Muoth fuva denton memia pauc enconuschents, ed examens e lur resultat saveva el era buca mussar, aschia che Steinhauer fa la proposta ch'il president dalla Cumissiun d'educaziun duessi sez serender a Minca per sefar in maletg sur dalla persunalidad dil candidat. Zazu viers la fin dil meins da fenadur s'entropa Muoth a Lindau cun president M. Capeder. Muoth seigi arrivaus cul tren en la quarta classa(!) ed eri sefatgs si cun bategls empristai. Mo ei ha tun-schiu. Ils 2 d'uost ei Muoth vegnius eligius successur da Giatgen Gisep Candreia, «als Lehrer der 'Geschichte für Katholiken' und für alte Sprachen». E gia ils 4 d'uost scriva Muoth a siu vegl amitg Loretan: «Nach langem Schweigen kann ich Dir nun sehr erfreuliche Nachricht melden, nämlich die, dass es mit dem alten Studenten ein Ende hat u. dass ich heute das Anstellungsdekret des Churer Erziehungs-

52) Cronica 2, 78.

rathes auf eine Professur für Latein u. Geschichte zugestellt erhalten habe.» Vargai ein ils siat onns maghers! Muoth secasa a Cuera ed ei ventireivels cun ina paga annuala da 2'500.- frs. Aunc 25 onns suenter seregorda el en in plaid d'engraziament a caschun da siu giubileum d'ina tala rihezia.<sup>55)</sup> El hagi cartiu ch'el sappi ussa cumprar anavos la Valtelina. Tunschiu hagi ei mo per empau vin dalla Valtelina.

El ha entschiet siu emprem onn da scola cun 27 uras ad jamna: 15 historia e 12 latin. Dasperas ha el priu contact cun la «Raetia», ina secziun da students dalla Zofingia.

Quella fuva en quels onns zun activa e ses commembers eran denter auter Andrea Vital e Caspar Decurtins, omisdus scrutaders da nossa cultura e menaders politics. Gia dalla bial'entschatta enneu s'interes-sescha Muoth per la scrutaziun historica e daventa commember dalla HAGG (Societad historica dil Grischun). E tgei commember! El presenta naven da lu cuntuadamein ils resultats da sias retschercas historicas en referats e pren adina il plaid suenter referats dils auters. Sias remarcas taccan e tuccan ils fatgs. Sez ha Muoth teniu sias lavurs historicas per pli impurtontas che las litteraras. El fa plinavon art e part dalla redacziun dil «Patriot», ina gasetta liberala romontscha, fundada 1874. Leu publichescha Muoth 1875 sia novella originala «Pregiudezis». A Cuera dat ei strusch ina fiasta romontscha, dalla quala Muoth fa buca part, oravontut dil Tscheiver Romontsch.

Aunc pli enconuschents e populars vegn el sco poet da texts per canzuns, principalmein per la Ligia Grischa. Igl ei pli che mo remarcabel, tgei che Muoth ha tut priu a mauns e prestau sil camp cultural sper sia scola. Muoth ei staus in bien scolast. Adina puspei han anteriurs scolars dad el, aunc dils davos onns, cura ch'el fuva gia empau stracs e staunchels, relatau ch'el fuvi in interessant magister. Directur dil seminari Martin Schmid ha adina puspei punctuau en scola che Muoth savevi raquintar sco mo paucs. Ad el curdavi adina puspei en egl, tgei mauns fins che Muoth havevi.

55 Cronica 1, 211ss.

Alexander Pfister, figiol da Muoth, sez um dalla historia e professer a Basel, ha adina admirau la gronda savida e buna lavur da siu padrin. El eri in um spirtus e tut auter ch'in bueder, sco quei ch'ins hagi vuliu far dad el ils davos onns ch'el viveva empau persuls e bandunaus sco mat vegl malsanetsch. El fuva staus in um da societad che gudeva la cumpignia ed in bien migiel vin. Ed essend persuls, stueva el era buca ir ad uras cunter casa a tscheina. Vegl scolast Luis Maisen da Trun raquintava aunc en ses vegls dis che Muoth schevi adina puspei ch'il ritmus il pli adattau pil lungatg romontsch seigi igl anapest. Quel ha el duvrau per exemplu ella stupenta ballada

### «La vendetga dils Grischs

Navèn dil Lucmagn tras la vall a sparuns  
Arrivan las roschas rabgiadas dils Hunns.»<sup>54)</sup>

La stad passentava el sias vacanzas a Breil. Leu ha el era mess en uorden tec a tec la situaziun finanziala dils ses, ha adina puspei pagau deivets, cumprau ni brattau fatg per segirar als geniturs in'existenza undreivla. Igl october dils 1884 ei sia suletta sora pupratscha morta.

Giacun Hasper Muoth, renconuschiu professer, poet e scrutader dalla historia grischuna cun existenza segira, veva mess a glei la situaziun fatala da ses geniturs, veva curonta onns e fuva aunc adina persuls.

Buca che l'amur vess mai spluntau e tulanau era tier el.

Quei gia da student a Minca, sco quei che «L'Amur studiosa» dat perdetga, aunc oz, era sche Muoth ha mai publicau questas tschun poesias d'ina amur tragica.<sup>55)</sup>

54 Poesias 1, 100. Muoth ha schizun midau ella translaziun dalla poesia «Der Heinzenberg» da Nina Camenisch ils jambus en anapests.

55 Alig, O., 1950, Giachen Caspar Muoth a München, en: Il Glogn 4, 51ss.  
Poesias 1, 213ss.

Da quei temps veva ina tala giuvn'amur buc in avegnir. Suenter sia mort, ils 1906, lai in'autra poesia – «Reminiscenzas» – dar in'egliada en siu intern.<sup>56)</sup>

### «Reminiscenzas.

Affuns miu cor ei in maletg  
Satraus e cuvretgs vi.  
Ei drova mo in pign schabetg,  
Per el scuvierer si.

L'amur survegn scadin carstgeun  
Sulet mo inagà,  
E quella va en carn e seun,  
Selai mai cuscentar.

Gie, siarra mai gl'original  
Siu meun e cor el miu,  
Lu vai cun mei adina mal,  
Quei vai jeu schon sentiu.»

Pli ch'in tschappel onns fuvan vargai, dapi che Muoth veva scret la «tresta brev a sia cara». Lu veva el 40 onns!

Igl onn 1884 para ina primavera tarda da ver scurlau el danovamein e buca senza consequenzas. Mo quei ei restau in misteri tochen en nies temps, era sche quel e tschel scutinava da temps en temps.<sup>57)</sup> Muoth ha empriu d'enconuscher lezza primavera la Franziska Simbeck da Minca,<sup>58)</sup> ina matta da 33 onns, che fuva da quei temps cun sia sora en Svizra. Questa sentupada ei buca stada senza consequenzas. Ils 2 d'avrel 1885 ei in fegl illegitim naschius a Minca ed ha survegniui il num Jacob Richard.

56 Poesias 1, 217.

57 Grazia alla lavour dedectiva da Leo Tuor eisi vegniu alla glisch.

58 Franziska Simbeck, fotografia en: Cronica 1, 298.

La mumma ei vegnida fiersa ord famiglia – ina veta tragica. Suenter 16 onns ha la mumma tarmess il fegl<sup>59)</sup> 1901 a Cuera tier siu bab. Lez ha dau ad el in'ura da sac e turnentau el a Minca. Pli tard ha el empriu il mistregn da suflader da glas.

Muoth ei morts 1906, ils 5/6 da fenadur, ed ei vegnius satraus la dumengia sissu. Alexander Pfister ha raquintau a mi entuorn ils onns 1950 ch'ina dunna cun in liung vel ner che cuvrevi l'entira fatscha hagi accompignau il vischi alla fossa sillla Cuort. Ils ins levien dispet saver, tgi che quei seigi. Auters manegiavien ch'ei seigi la Mumma romontscha.

Per mias marveglias veva il figiol da Muoth mo in lev surrir. Ins astga supponer ch'ei fuvi dunna Franziska Simbeck. Ella fuva 7 onns pli giuvna che Muoth, veva pia lu 55 onns. Ella ei morta treis onns suenter Muoth en consequenza d'ina collisiun cul tram. Ch'ei han giu correspondenza ei in fatg. Las brevs ein vegnidas barschadas avon paucs onns dad Elfriede Fahnler-Simbeck, biadia da Muoth. Donn e puccau! Igl onn 1886 cumpara «Il Gioder/Ina cantada sur fatgs de cuschina/ dedicada /a nossas casarinas, mo senza malart». En enconuschiantscha dils fatgs indicai sura, vegn ins a leger certi passadis da questa cantada cun empau auters eglis, savend che Muoth ei zun retratgs en caussas persunalas. El «Gioder» engartan ins beinduras tgei problematica che fatschentava gest quei temps il mat bein madir.

### «Il matt.

Gioder, il fegl dil mistral, artavel solett della rauba,  
Fatga d'in bab spargnus cun agit de viewas ed orfans,  
Steva sin far il propiest, de viver en sogn purschalladi  
Leva portar quei niebel tschupi sil crest della fossa.»<sup>40)</sup>

59) Jakob Richard Simbeck, fotografia en: Cronica 1, 227.

40) Poesias 1, 53ss. Tuts citats dall'ovra sezza en l'ortografia originala.

Il Gioder che vess saviu «maridar l'entira vischnaunca» veseva da-pertut ina menda tier las mattauns. Bein disaus sco el era da sia buna mummetta.

«Mo sin instant giavisch de sia cara mummetta

Che volev'ina brit ed in pitschen beadi en tgina»

Quei fuva capeivel, era Giacun Hasper sulet fegl, ussa professer schizun ed ils geniturs entuorn siatonta. Il Gioder lai buca per la breigia, sefa si e va alla tscherca.

Mo «Indisch gadas fuv'el sbagliaus, suondont la parett». Aunc ina emprova. El va alla fiasta da s. Placi, banduna denton sco puccont stinau la baselgia:

«Snega ded ir en processiun e cantar litanias,

Va culs pagauns dina vart a mischun sillla spunda dil rieven».

Gioder catta da cheu anora ella processiun duas mattauns da calamita e suonda ellas ensemencul bab ella Cruna. Leu sefa el vitier, genta cun els, lauda las tratgas grischunas e vegn envidaus da star sur notg si Segnas, nua ch'els ein da casa. «Bella glina sclareva la notg e Gioder dormeva», in dultsch siemi. Pertgei el sededesta e marmugna:

«Mumma, jeu vegn, jeu hai enflau ina dunna de casa,

Ina, che sa cuschanar sco ti, che fila, che teissa,

Possi in auter portar il tschupi dil sogn purschalladi.

Jeu vi dunn'ed affonts, che bragien sil crest della fossa;

Quei ei la dretga rugada sil di della gronda levada.»

Oz savein nus che Muoth ha gest quels onns leu giu da far cul «sogn purschalladi». Igl ei evident ch'il Gioder stat maneivel dalla veta persunala da Muoth. Silpli san ins sedumandar, schebein la veta privata hagi schendrau il Gioder, cumparius en «Il Sursilvan» igl uost 1886, ni

sche la naschientscha dil fegl Jacob Richard Simbeck, all'entschatta d'avrel 1885, seigi stada igl emprem.

Giacun Hasper Muoth ha priu viva art e part dalla veta culturala a Cuera, dalla romontscha sco poet da canzuns ed autur a caschun dil Tscheiver Romontsch e confundatur dall'emprova decisiva dalla fundaziun della Societad Retorumantscha ils 1885. El ha era publicau stediamein da sias ovras en las Annalas.<sup>41)</sup>

Buca meins activs eis el staus sco fideivel member della HAGG<sup>42)</sup>, ha presentau en siu ravugl biaras gadas ils resultats da sia scrutaziun dalla historia grischuna e priu part dalla discussiun en moda zun fritgeivla. Adina puspei han sias lavurs ni sias ideas ellas discussiuns dau impuls era ad auters, aschia era per la scrutaziun dils numbs da persunas e locals. Gia ils 1888 ha el referiu el ravugl dalla Societad Retorumantscha sur digl «Idioticon romonsch».<sup>43)</sup> Igl onn 1891 fa Muoth amogna in'emprova pigl Idioticon, oz DRG.<sup>44)</sup> Per la cumissiun dalla Conferenza scolastica dil Rein ha el concepiu e publicau 1888 las «Normas ortograficas ... per igl idiom sursilvan». Per la scola haveva el gia ediu 1882 il cedisch da leger per classas aultas dalla scola primara, igl «Eberhard II», augmentaus cun «lavurs originalas d'auturs romonschs». Igl ei stau ina buna nova per el ils 22 da matg 1902, cura che Felix Calonder, pli tard cusseglier federal, ha inoltrau la moziun el Cussegl grond che prof. G. H. Muoth duessi vegnir incumbensaus da scriver ina historia grischuna, retschevend la medema paga sco quei ch'el hagi ussa pil temps ch'el seigi occupaus cun quella lavur. Ed il cussegl ha dau suatientscha alla moziun e surdau al Cussegl pign l'incarica d'exequir la caussa.

Muoth veva lu mo 58 onns. Tenor aspects humans vess el giu silmeins aunc diesch onns temps per scriver sia historia. Cumpetents fuva el en scadin cass. Mo cun sia sanadad steva ei gia lu buca dil meglier.

41 Muoth e la SRR, Cronica 2, EX 19.

42 Muoth e la HAGG, Cronica 2, EX 18.

43 Cronica 1, 164.

44 Cronica 1, 174.

Suenter la mort dils geniturs, la mumma da s. Silvester 1892, il bab già il fevrer dils 93, ei era il fegl sefatgs vegls avon temps. Quei sentevan era ils scolars che capevan buc adina l'originalitat ed atgnadad dil mat vegl e selubevan beinenqual caussa. Mo ina anecdota dallas biaras che cursavan sco G. Deplazes relata en «Prominenzas». Duront la pausa ughégia in scolar da scriver silla tabla: «Unser Professor ist ein Esel.» Empau da ferm tubac! Tuts ein spanegiai, cura che Muoth entra. El dat in'egliada silla tabla, pren la rida e scriva davos igl *Esel-treiber*. Lu entscheiva el sia lecziun.

Muoth fuva selegraus da sia incumbensa, dada dil Cussegl grond. Siu pensum alla Scola cantunala ha el schau reducir sin sis uras ad jamna ed ei semess alla lavur.

In onn pli tard sto el sedefender<sup>45)</sup>, essend ch'ins vul buca conceder ad el igl alzament da paga da 300 frs. ad onn sin 3800 sco a ses collegas. El medem scriver indichescha Muoth era la lavur preparatorica ch'el ha fatg dapi sia incumbensa.<sup>46)</sup> Ed el manegia cun tutta raschun, sch'ins considereschi ch'el detti aunc sis uras scola sper sia lavur, sappien ins crer: «Billiger kommt Graubünden nicht leicht zu einer Geschichte.» Lunsch eis el denton buca vegnius cun sia historia grischna. Ina caricatura dils 1894 mussava Muoth sesend davos in triep butteglies e scrivend sia historia grischna, arrivaus tochen il «Veltlinermord». Bia pli lunsch eis el buca vegnius. Sia sanadad ballestra pli e pli. Curas e bogns portan buc il levgiament spitzgau.

La notg dils 5 als 6 da fenadur 1906 miera el el Spital dalla crusch ella vegliadetgna da mo 62 onns. Ina veta entira en survetsch dalla cultura ei ida a fin. Ina veta buca senza tragica.

45) Cronica 1, 237s., brev da Muoth al Departement d'educaziun.

46) Cronica 1, 238; Plan zu einer Bündnergeschichte in zwei Bänden, en: BM 1945.

## Sia spina

Muoth era buca quel che palesava bia ord sia veta persunala. Anzi. Tgi che vul intervegnir enzatgei, sto leger minuziusamein sias ovras e tschercar leu, interpretond lezzas e cumparegliond quellas cun sia veta, schilunsch che quei ei pusseivel.

Muoth fuva in legher mat che fageva bugen part da fiastas e sulazs. Quei gia sco scolar e student. Star da cumpignia fuva per el in basegns. La scola deva ad el pauc panzieri. Dapertut fuva el in bien tochen fetg bien scolar, beinvesius da ses magisters e conscolars. Sco fegl dad in pur beinstont pareva siu avegnir segiraus, malgrad las stuornadads da siu bab.

Mo surura ha ei dau ina greva purginada sillla flur da sia veta.

Giacun Hasper veva 22 onns e fuva in legher student a Friburg el gimnasi, cura che la nova surpren el, che ses geniturs fetschien scussiun. Siu bab fuva secavistraus en spir deivets e carplinas e stueva vender siu fatg toc per toc. Ei reussescha aunc da segirar la facultad dalla mumma Cristgina, nata Tuor. Igl avrel 1867 banduna Muoth il gimnasi e tuorna a casa. Leu vegnan ils crediturs clamai.

«La zanur da quella sclavinada ha Giacun Hasper adina resentiu», scriva Leo Tuor.<sup>47)</sup> Igl unviern 1867/68 ha Muoth stuiu passentar a casa. Ins s'imagineschi in mat da 23 onns ch'ei staus tochen ussa tscheu e leu el studi, fegl d'in bab pussent cun ina brava bucca nauscha en in vitg sco «student perpeten»! Gomias e pataheflas mauncan buc. Quei ei l'ura dall'incubaziun culla spina e la naschientscha dil poet Giacun Hasper. Tgei leva el far duront ils liungs dis da neiv e cufla? Ir a pver franc buc. Ch'el savevi mulscher, stat scret negliu. Ei deva nuot auter che da sefierer en ina lavur adequata. «La casa ei barschada giu, ussa tucca ei de far si in'autra.»<sup>48)</sup>

Las stagias dil poet da pli tard ein gia tschentadas: igl epos<sup>49)</sup> e la

47 Cronica 1, 74.

48 Cronica 1, 74.

49 Las spatlunzas, Il Gioder, A mesiras, Il Cumin d'Ursera, La pasculaziun cumina.

perdetga ord la historia grischuna en tontas balladas.<sup>50)</sup> Leutier las numerosas lavurs historicas per tudestg e romontsch.

Scussiun fuva da lezzas uras ina macla che signava buca mo quei tal che scheva spiarder, mobein sia entira famiglia, gie schizun la parentella. Patertgeien mo a Gion Ant. Huonder e ses frars! E Giacun Hasper ha stuiu star a Breil, s'entupar cun ses vischins. Ina zanur, ina spina en sia spatla che ha mai calau da morder. Quei tonpli che el, ils ses, mo era auters vischins han adina puspei schau sentir ch'ins seigi staus nauschs e malgests cul Mattiu. Ch'ei fuva hanau da contrahar cun el, era enconuschent ed ei per part perpetnisau ellas anecdotas.<sup>51)</sup>

Ussa eis ei surschau als lecturs da tschercar fastitgs dalla spina en sia ovra. Pertgei directamein ei Giacun Hasper Muoth untgius da prender zacu posizion concreta.

El ha segirau la casa a sia mumma, el ha pli tard cumprau anavos ni liberau dils deivets certi frusts senza fierer crappa sin quel ni tschel. La spina ha denton furau per veta duronta. Oravontut pren el sils corns ils ugaus sco administraturs ed usurpaders da facultad jastra:

«Epitaph sulla fossa d'in schliet ugau.

Cheu schai en freida fossa

In rufinau ugau.

Schi ditg, ch'el ha giu possa,

Cheu ha el engolau. –

Ruaus a sia ossa!

El ha eung bia urau, –

Mo mai, mai nuot turnau.»

Questa poesia hagi Muoth scrit a Minca. Publicau ella ha el mai. Ella ei cumparida dus onns suenter sia mort. Ch'el ha denton buca disfatg

50) Il ciclus retic sco La dertgira nauscha da Valendau etc.; il ciclus svizzer: Ils tgapers de s. Meinrad etc.

51) Deplazes, Prominenzas, 105ss.

ella, ei la caparra ch'ella veva per el in'impurtonza. Ins astga supponer ch'ella seigi naschida ils onns 68/69 sut la peisa dalla scussiun dil bab.<sup>52)</sup> Quei «crap da fossa» pigl ugau cuntegn sal e peiver. Igl ugau ha buca mo engulau e raffau schiditg ch'el ei staus en possa, na, el ha aunc «bia urau» per aschia cuvierer la cugliunaria, «mo mai, mai nuot turnau».

Ch'il giuven Muoth fuva cargaus paleisa la «canzun»

Diesch onns «Ils ugaus en conferenza secreta.»<sup>53)</sup>

Ina conferenza da 4 ugaus, nua che mintgin sedat neu sco el ei e tgei ch'el fa. Amplificaus vegn il cunfar dils singuls beinduras tras ina strofa da tuts. Tut cumpriu consista la poesia da 17 strofas a sis lingias da 3 e 4 jambus. Cheu suondan las treis empremas strofas:

«*Tuts.*

Nus essen gleut da buna fei,  
E nies da far adina,  
Ei regier ora quei e tschei  
Sil prau ed en cuschina  
Quei ei gl'uffeci d'in ugau,  
De per ils auters 'ver quita.

*1. Ugau.*

Gie, mes amitgs, vus veis rischun:  
«*Quita*» ei nies uffeci,  
Da mai sebetter a bandun  
E tut tener a preci:  
Quei ei la lescha d'in ugau,  
D'in Oeconom da bien quita.

52 Camartin, I./Tuor, L., 1997, Giacun Hasper Muoth, Commentari 1, 323s.

53 Text entir en Poesias 1, 190 – 193.

## 2. *Ugau.*

Mo quei sto el tener a pez  
E mai emblidar via,  
Che el engraschi si sesez  
Cun beins de l'ugadia:  
Quei ei la moda d'in ugau,  
Che ha citgei exper'mentau.»  
...

Cun esser ugau da rehas clientellas eisi bi da prest bia rauba acquistar.  
Mo era il pauc ei buca da ruffidar. Enzatgei rest'ei adina. Brels e buots  
e tut svidar, far pintgas cuorsas e fetg quintar, ver bia curascha e pauc  
cunscienzia.

«Urar debia, far il sontget,  
Quei ei la meglra cozza,  
Quei dat bien tun ad in falzet.  
E sularescha lozza.  
Ils egls dil pievel ein schi tschocs  
Ch'ei vezan broda senza gnocs.»

Ed aschia vinavon, ina liunga litania. Era questa poesia ni canzun ei concepida a Minca, ei turnada cun Muoth en Svizra, denton publicada pér 1908, dus onns suenter la mort digl autur. Ella ha pia accumpignau il poet ina veta entira, senza ch'el fussi sefatgs libers. Buca per nuot! Il commentari da Leo Tuor: «La filosofia ei clara: ugaus ein canaglia. Ils ressentiments che Muoth ha encunter els ston vegnir capi en connex culla scussiun dil bab da 1867, la ruina finanziala e psicologica da sia famiglia.»<sup>54)</sup>

Indezis plaidan che tut seigi buca iu tier gest, ch'ei seigi stau in act da vendetga encunter il bab sturnichel che veva vilentau tut ils signurs, aschia che quels han empruau ed ein vegni da promover la scussiun.<sup>55)</sup>

54 Commentari 1, 324.

55 Pareglia Cronica 1, 75, nota 2.

Tonpli stueva il fegl esser vulneraus per veta duronta! Quei ei stau la spina che ha cumpignau el sia entira veta. Patertgeien aunc ina gada al Gioder, ina ovra naschida 1886 che Muoth veva 42 onns e fuva renconuschius sco professer:

«Gioder, il fegl dil mistral, artavel solett della rauba,  
Fatga d'in bab spargnus cun agit de viewas ed orfans ...»

Diesch onns pli tard en sia cantada alpina «A mesiras» vegn igl «assistant» adina puspei tundius. Aschia els vers 126–133:

«Mo giudim muletg ils stavels  
Vegnan umens pli capavels,  
Gl'aug mistral e gl'aug scrivon,  
Giuncher Casper cul caplon,  
Cun suitas de gieraus  
E de tuttas sorts ugaus;  
Gie perfin gl'ugau de spenda,  
Quel, ch'il graun dils paupers venda».<sup>56)</sup>

Gie perfin el «Cumin d'Ursera», sia capodovra e nies poem naziunal, cumparius 1896 egl emprem tom dalla Crestomazia da Caspar Decurtins, ha Muoth tschentau in «monument» al tormentader da sia veta. Denter la bargada dalla Cadi che serenda cugl avat Pieder de Pultengia a cumin on d'Ursera secatta era in «Giacum Fiergnia, de Bugaus». Bugaus ei nuot auter che ugau. Ed il num Fiergnia ei tut auter ch'ina honur, mobein stat per in grev defect da caracter.

La scussiun dils geniturs ha buca mo privau il student da siu fatg e surtratg cun zanur la famiglia, ella ha era dau alla veta da Muoth in'autra direcziun, ina fatala. Senza la nauscha scussiun da siu bab vess Giacun Hasper che veva mussau ellas differentas scolas medias

56 Poesias 1, 111.

ch'el veva buns talents saviu cuntinuar ses studis e finir quels en moda ruasseivla ed undreivla. El vess saviu fundar ina famiglia e fuss staus zanua da casa. Ch'il problem ha fatschentau el, tradeschan entginas da sias ovras. Aschia «L'Amur studiosa» cun sia fin da plaronza. La sentupada cun Franziska Simbeck digl onn 1884 veva regalau ad el in fegl, mo buca menau ad ina lètg. Il pertgei ei buc enconuschent, essend che la correspondenza ei vegnida destruida avon paucs onns. Burnida fuva aunc adina cheu!

En las «Notizias ord il schurnal (diari) din mat vegl»<sup>57)</sup> digl onn 1889 duront ina jamna legian ins per la sonda:

«Sun sco sturnius,

Mo decidius

De star persuls.»

E suenter 10 onns concluda el:

«Ti has spetgau

E ponderau

Mirau, lignau

E calculau

Ed eis uss in pauper bandunau.»<sup>58)</sup>

Bein savess ins ponderar auter. Co fuss ei iu cun nies pauper Muoth, sche tut fuss iu alla grada? El fuss staus in legher studiosi, vess fatg buns studis e finiu cun in fetg bien resultat. El vess publicau numerusas lavurs da retscherca historica, fuss daventaus in bien professer en ina universitat – forsa schizun en Tiaratudestga. Las qualitads vess el giu. E nus Romontschs vessen mai giu nies poet Giacun Hasper Muoth, savessen podà strusch ch'el vess existiu.

57 Poesias 1, 87ss.

58 Poesias 1, 88s.